

JOSUEE

Josuee Naajioneer

**Pueyaso jiyatesacari Josuee Israel
pueya puerojona na quiniuria
Moisees niti**

1 ¹Pueyaso jiyaraajia Moisees shaajenu nuhuaji, Pueyasoori Josueeta pocoojoquiaari. Josueecuajaari Nun jiyanishano niyanu quiriqiuase. Moisees naacuna quijiajaariuhuaj. Pueyasoori jiyacari naa Josuee sequereequij:

²—Cua jiyaraajia Moiseescuajaari tari shaajeyarucuaa. Naacuatej, quiajaniyajanaari quiarijia quiarta Israelcuajinio caneno pueya niuutiariquiano nio Jordaan moo. Naa cuno jiyacua quia niuutiarie quiarta pueyatej. Janiyacuajaari puetunu niajaniyajanaa serotanutaniya cuno jiyacani. ³Puetunu nia tiuquitiasano jiyacajanaani, janiyari cuno jiyaca nia camaruutiriquianoni. Janiyacuajaari naa cua miishocoriquiano tariucua Moisees sequenoni. ⁴Janiyari noo jiyaca nia niquitioriquianoni, cariquia jiyajini-ji coteyatej. Cuniqiji puetunu Liibano jiyanishano tuhuananuhuari niaaranohu-
huaj. Nia jiyacaari cuno puereetuuca Eufrate jiyanishano moocua puequeeriquiano. Naacuatej niaara quiniutianiyari puetunu Hitita taucuaca jiyacajanaa. Niaarano jiyari

Mediterraaneo jiyanishano shoniniacu caminiajinia puequeenutaniya. ⁵Quia paraari quia nujuataaquiriquiano nojori quia miaquejosacari. Quiaari naa nojori miaquejoriquianojuhuanaja pueyaracaa-
nu quia rishishacarijia. Janiyajanaari quia cojiriquianoni taa Moisees cua cojiquiaaricuaani. Majaari tamajaaja quenaaja cua cartenu quiniutianiya quiajaniya. Janiyari quiocuaji rupateyaquiriquianojuhuanani. ⁶Tama quia cuaqueyajaaja quia cumaquiriquia. Majaari quioojia niquijiotenu. Quiaari nio jiya serotariquiano puetunu quiarta pueyajanaa. Naacuatej, nojoriiri na camaruhua quiriqiuano. Janiyari naa niquitionutaniya nio jiyatej, taa tariucuaacaanu nia supuetanaa cua sequequiaari niaarano cua niquitiosocoriquianocujani. ⁷Janiyari jiyanohua quia panitiaa tama quia cuaqueyajaaja quia cumaquiniuni, maja quioojia quia niquijiotenura. Naajuhuaj puetunu cua rupaa naajiojanaa tojijia quia quiriqia teyonu cua jiyaraajia Moisees niquitiorucuaa quiajaniyacujani. Seetanujua-
naa cuno rupaa tojijia quia quiriqia. Naacua cutaratej puetunu quia miishanojanaari maninia quiniutianiya. ⁸Quiarano cua niquitiosano cua rupaa naajio quia caapueshiijiotariquia quia niishitiajajinia na jateenura. Naa quia

miiriquia juuca, niucuaajaanio. Quiaa jaara naa miiritij, quiaari naacua cua rupaajinia naajio cua sequesano miiijia quiniutianiya. Naacuatej, puetunu quia miishanojanaari maninia tohuatenutaniya quiaara. ⁹Janiyajanaa-cuaajaari quia shiniujiyani tama quia cuaqueyajaaja quia cumaquiniuria, maja quenaaja quioojia quia niquijiotenura. Majaari puerenu. Majaari quia miiniu panishanojiniji taacanuunujuhuj. Janiyajanaacuaajaari quia Camarnu Pueyasoni. Naacuatej, janiyari tiquiyocua quia cожiriQUIANOJuhuananij.

Israel pueya coseyacosacari na paraa jiyajinia nojori tiuquitianura

¹⁰Jiyacaritij, Josueeri naa numootejo-quiaari puetunu Israelcuaajinio caneno jiyaniijianucuaajanaa. Naa nojori sequequiaariiri:

¹¹—Puetunu pueyajanaa nia numootejore cuaara coseyaconuura na jiyatasocoriquiano. Paari niiquiji tama tariqui quianutaniyani. Paari Jordaаn moo jatariquianoni pa jiyarano Pueyaso niquitosocoriquiano jiyajinia pa tiuquitianura.

Josuee jiyaramiquishacari pueya Jericoo tiaca manujunuucua

2 ¹Sitim jiyanishanojiniji tee nojori quituriQUIAACUAJANIJ, Josueeri cuniquiji jiyasohuaja querajaa canuu jiyaramiquiquiaari. Naa nojori sequereeri:

—Puera nia manujucoo pa jiyarano, tii quijia Jericoo jiyanishano tiacajaajanio.

Cuno pojoriiri quiojoquee. Jericoo tiacajinia tiuquitiushiiri paanatu tiajinia. Cuno paanatuuri Rahab jiyanishano quiriQUIASE. Tii maquetuQUIAARIIRI. ²Jiyacaritij, cuno

Jericoo tiacajinijinio tahuejaari tama nojori camarnujaaja numootequiaari. Naa na sequequiaariiri:

—Querajaa Israeljinijinio pueya niya pocua tiuquiriini pa jiya na manujunura.

³Jiyacaritij, Jericoo tiaca camarnuuri na rupaa jiyaroree Rahabcua. Naa na sequereeri:

—Canaacua quia tohuatejore cuno pueya, quiocua tiuquirii quia tiajiniani. Majaari quia niishiniu, cuno pojoriiri pa jiya manujunaa.

⁴Rahabri cuno pojori jamojoquiaari saaja. Nojoriicuaaji na tacunuucua, saaja naa sequequiaariiri:

—Taaquiriirinij, querajaa canuucuaaquiniateja cucua quiquiijiaj. Maja cutaraari cua niishiniu quiriQUIAA tejeno pueyateja quiriQUIAANI. ⁵Tariucua niucua quiojocuhuaano. Jiyacaricuaajaari pa tiaca tohuateya mishiQUIOSACARI. Maja cutaraari cua niishiniu tee na quiojocuhuanij. Niaa jaara quiarijiaja na nuhuaji ritia netecuatiuyare, niaari nucuamaja na coquenutaniya.

⁶Rahabcuaajaari manujunaa tacanijio-quiaari na tia cacojoria, tii cuno pojori jamaatiuniuria. Tii pananu cari na sacuanetanura na niojosano lino cariquioco na jamojoquiaariiri.

⁷Jericoo tiaca camarnu jiyaramiquishano pueyari Jordaаn moojiniaa neteja nucuama netecuatuquiaari Jordaаn moo niuuniujutiaja nuujiniji na cuuquenura. Manujunaa neteyotariQUIANO soldadohua tohuatejo-sacari, Jericoo tiaca tiotiuuri ritia nojori nuhuaji mishiQUIOSAAQUIAARI.

⁸Jiyacaritij, jamojosano manujunaa maquetiuyaquishacarijia, Rahabri nojoriicua tacaquiaari. Naa nojori sequereeri:

⁹—Janiyari seetanujanaa niishiyani, Pueyasoori tariucua niaarano nio jiya

nia niqutiono. Naacuatej, nojuajaari canaa tojeteree jiyanoehua canaa puerenura niajaniya. Canaa, puetunu nio tiacajinia quijiacajanaanij, puetunu canaajanaari quera cusunutaa canaa puerenuni. ¹⁰Canaacuajaari niishiyani, Egipto jiyajiniji nia quiojosacari, Pueyasoori Naatunacu jiyaniishano caminia joojuaquijiacanu joojuashiquio nia niutiajara. Canaari niishiyajaniuhuj taa nia miaquejocanu tojetaarucujanaa cuno querajaa Amorreo camarucua na jiyajiniji puetunu na pueyatajanaacuaani. Cuno pojoriiri Sehoon, Ognio. Nojoriiri Jorjaan moo taquijiria quijiaa quiriqiuase. ¹¹Naa canaa tojinuuniucua niajanijajinijitij, canaari naacua jiyanoehua puereyani. Naacuatej, majaari nio tiacajinijinio pueya miaquetoonu paniniu niaata. Cuno nia camarnu, nojuajaari Pueyasojuaana, jiya cajiniocua, nio jiyacuanio. ¹²Naacuatej, quiarjia Pueyaso niqiaraja, seetanujuaanaa cua sequeture, niaari cua jiyanootiuniutianiyacujua. Maja saa janiyaja, nojoriiri puetunu cua tiajinia quiniaajanaa. Janiyari naa paniya maninia canaa nia miiniuriatej, naatej taa maninia cua miirii niajanijacuaanij. ¹³Naa cua masesano quiria nia miituriija. Quiria nia jiyanootiurijia cua que, cua nucua, cua nanuhua, cua tarajanuhuaajanio, puetunu nojori niquiohua, puetunu nojori jiiitasano casamijiaajanio. Niocua canaacuaji niarta pueya tenujreja, maja canaa miaquejosaanuraaja.

¹⁴Manujunaari naa Rahab riucatureeqij:

—Niaa jaara puecoosaare, tama canaajaariija canaa cuaqueya miaqueriquianoni. Canaari naa miiriquianotej quiaa jaara seetanujuaana canaacuara tonujuyaquiri niya

canaa jamaatiuniujiniji. Naacuatej, Pueyaso jaara tari canaa niqutiooree nio jiya camaruhua canaa quiniuria, canaacuajaari maninia quia miiriquianoni.

¹⁵Rahab tiaari Jericoo tiaca shocua mataca casacaacua quijia. Naacuatej, nojuajaari na jamojosano manujunaa roshinijioquiaari quereyocua sohuane-yocuata na tia tacuhujajiniji. ¹⁶Rahabri naa nojori sequeere:

—Ritia niqijiji nia quiaare. Niocua tuhuananuhucua jamaatiushii nia pajenaa mariqui nia riuriatareeri. Niocua tii camueenujusee jiuujianaraca juucua nia pajenaa cuaara tiacajinia tiuquihuarajaatijaj. Cuno jiuujianaraca juuca nuhuaji cutara, niocua nia jamaatiushaquiiji juhuajaniya quiaarohua cutara.

¹⁷Manujunaari naa Rahab riucureeqij:

—Canaacuajaari seetanujuaana miiniutianiya quiaara canaa miishocoriquiano canaa quia masesanoni. ¹⁸Nio nia jiya canaa tiuquitasacari, quiocua nio naatiuyocua jiyocua jaasutere quia tia tacuhujajiniji teyanoochoji canaa quia roshinijioreecuajani. Quiocuaqui quia que, quia nucua, quia nanuhua, quia tarajanuhua, puetunu quia camacajanaa tamuetore quia jiyaco. ¹⁹Saniniujia, niquiriyatu nojorjinijinio jaara jiyacari tohuatama, jaara tamasaata cojiritiasaare, cunoori tama nojuajaaja, maja canaa. Naajuhuj, canaajinijinio jaara quia tiacoji jaari jamayano na mosocoriquiano, canaari naa quia miinio namiriquianoni.

²⁰Saniniujia, quiaa jaara canaajiniji pohuatare taa canaa miiniutianianij, majaari jiyaniinu canaa quiaara miiniutianiya canaa quia masesanoni.

²¹Rahabri nojori riucuree:

—Cuaara naa quiriia taa nia sequeerecuajanj.

Rahabri manujunaa saruhuateree cuno pojori quianura tiji. Manujunaari tiji quiaquee. Rahabri nojori nuhuaji cuno naatiuyocua jiyocua jaasuteree na tia tacuhujiniji. ²²Cuno querajaa manujunaari tuhuananuhuacua quiatuquiaari. Tii jamaatiuquiaari jiuujianaraca juucaari. Jericoo tiacajini-jinio nojori nuhuajinio nojori pajenuucua jiyaramiquishano soldadohuari juucua niyacuneetaquiaari nojori na pajesacari. Na tarinitiatuteree socuaari. Jericoo tiacajinia riujiuutiaarohuari. ²³Jiyacaritij, tuhuananuhuacua jamaatiuyano manujunaari na jamaatiushaquiiji rosetaquiaari. Joraaan moo jatatumohuari. Josueecua tiuquitiushuhuari. Jiyacari Josuee pohuatuteree puetunu nojori miishanojanaari, naajuhuaq taa nojori miishaareejaniuhuaq. ²⁴Naa Josuee sequetureeri:

—Pueyasocujaaari tari pa niquitioree puetunu cuno jiyajanaa pa jiyarano. Naacuatej puetunu cuno jiyajinia quijia pueyajanaari jiyanojua pa puereyani. Quera na puerenu cusuutatuiano.

**Josuee naacuneetoosacari
Camarnutajanaa**

5 ¹³Tamonu juuca Josuee quishacari cateca naata Jericoo tiacajiniji, pueyano niquirii na tajoji nujuaanoori. Cuno pueyanoori na nijiniaquetucujaa mueruu cacariquiaa. Josueeri nocua cateconuree. Naa na nequesotareeri: —¿Quiaatee canaajininijinio cuarta pueyano? ¿Quiaatee canaa paraajininijinio soj?

¹⁴Cuno pueyanoori Josuee riuquaree:

—Janiya tojetaarucujanaa tamonuni. Janiyacujaaari jiyocuaaanu Pueyaso seya Camarnujanaani Josueeri naacua jiyocua jacamareequij. Na jiniji rupeteree

jiyocuaari Camarnujanaa tajoji na quiniuucua. Naa nequesotaree na tajoji nujuaano Camarnujanaari:

—¿Casaa cua Camarnu sequenutaniyacuaa nio na jiyaraajianij?

¹⁵Jiyocuaaanu Pueyaso seya Camarnujanaari naa Josuee riuquareequij:

—Quia sapatu quia jocojore tojetaarucujanaa sesa miyaquijia quishaqui quia quiniuucua.

**Pueyaso niishitiojosacari Josuee taa
Jericoo tiaca nojori
tiuquitianutaniyani**

6 ¹Jericoo tiaca tiotiuuri maninia mishiquiojosaaquiaari. Naacuatej, majaari pueya tohuareetanu quijia, majaari na tiuquitianu quijiajuhuaj. Naa miitiuquiaariiri maja Israelcujajinio caneno pueya tiuquitianura nojoriicua, nojori na miaquejonura.

²Camarnujanaari jiyacari naa Josuee sequerequij:

—Janiyari Jericoo tiaca camarnu na soldadohuataja quia miaquejotenutaniyani. ³Naacuatej, nio nia miiri: puetunu Israel miaquejonaa pueyajanaa cuaara camarucutaraa Jericoo tiaca shocua. Niocua naa miiri seis juucatej, puetunu juucajanaa. ⁴Naa Jericoo tiaca shocua nia camarucuneetasacaritij, quiocua Pueyaso quijia cojee patanaa tajoji pueratejore siete pueyacuara secojonaa. Nojori cuaara na pootusano borreeco nacaja jonenenuura Pueyaso quijia cojee patanaa nojori puetanuucua. ⁵Saniniuuja, puetunu niajanijajanaa, niaa jaara borreeco nacaja tojiri tamaatia joneneshiyano, niocua jiyacari jiyanojua na jaacatare. Nia niquishuriria tiaca shocua matacaari jiyacari jiyajeetanutaniya tamajaaja. Niocua jiyacari ritia nocua netecuatuquee

puetunu cuno tiacajinia quijiacajanaa nia puecoonura.

⁶Josueeri jiyacari pueyacuara secojonaa rerejoteree. Naa nojori sequereeri:

—Pueyaso quijia cojee nia pataare naajuhua jiete niajanijajiniocua Pueyaso quijia cojee patanaa puetasee borreeco nacajaa na jonenenuunuta.

⁷Saniniuujia puetunu narta pueyajanaa sequereeri:

—Pueyanaa, Jericoo tiaca shocua nia camarucutare. Teyano pojoritiucua ja na paraa miaquejoriquianoni, nojori cuaara Pueyaso quijia cojee patanaa puetaara.

Israel pueya tiuquitasacari Jericoo tiaca

¹²Naacuatej, Josueeri tariquicuaji sanequiaari, pueya jiyataqueeri. Pueyacuara secojonaari Pueyaso quijia cojee patatiyareejuhua. Quiojoqueeri. ¹³Siete pueyacuara secojonaari Pueyaso quijia cojee patanaa puetaquiaari. Na canujuucuatunutaja borreeco nacaja jonenenuuriquiaari taa nojori sequesaa-quiaaricujani. Naacuatej, nojoriiri maja quenaaja rupaquijia na tarinitianu quiquiaari jonenenu. Jiyacaritij na paraa miaquejoriquianoori jonenejona puetariquiaa. Nojori raquii Puyaso quijia cojee patanaa nuhuajiquiaarijuhua. Jiyacaritij, borreeco nacaja jonenenuunaari maja quenaaja na samaatenu quiriquiaa jonenenu. ¹⁴Naa pacutetusee tariqui Jericoo tiaca shocua camarucutanuuriuhua. Na nuhuaji quiojyarohua na suhuortucujiniaari. Nojoriiri naa puetunu juucajanaa camarucuneetaja cuno tiaca shocuatej. Naa miitiquiaari seis juucaari.

¹⁵Seeptimo juuca nojori juhuaquesacari saniniuujia, nojoriiri tariquicuaji sanetaquiaari tiaca shocua pacutejonu

camarucuneetanura. Cuno juuca cutara, nojoriiri siete pacutejoquiaari camarucuneetanu. ¹⁶Jiyacaritij, pueyacuara secojonaa jaara tari jiyano hua jonenenuquiaari Josueeri naa sequeree puetunu pueyajanaatej:

—iJiyano hua nia jaacoonuure!

Pueyasocuaajaari tari nia paraa niaree nia juaashiquiajina. ¹⁷Nio nia niishiri cutara. Cuno tiacajinia quiniaa cuaara puecoosaaria puetunujanaa, majaari quenaaja niquiriyatu curonu. Pueyasocuaajaari naa cua sequeree pa miiniuria nojoritij. Niocua pocua taraajena Rahab jiyanoori cutara puetunu na tiaco quiniaa pueyatajanaa. Cuno paanatucuaajaari nio tiaca manujunuucua pa jiyaramiquishano pueya jamojona.

²⁴Israel pueyari naacua catijiatquiaari cuno tiaca tojetaarucujanaa. Tiaca catijiatquishacarijia, nojoriiri saaja nio casami saquiriojoquiaari coteenu: plata, oro, puetunu broncejiniji, hierrojiniji shipinijosano casamijaajanio. Puetunu cuno casamijianaari Pueyasora jiyatesaaquiaari. ²⁵Saniniuujia, Josueeri Rahab jiyano quiaari puetunu na tiaco quiniaatajanaa. Nojuacuajaari manujunuucua Jericoo Josuee jiyaramiquishano jamojoquiaari na tiaco. Naa Rahab jiyanooshaanuucuatej, nocuajinio caneno pueyari naacua Israelcuajinio pueyata quiaquij.

Puetunu taucucajanaa miaquejosacari

11 ²³Josueeri naa miaquejoquiaari puetunu cuno taucucajanaa nojori jiyacajinijitij. Cuno jiyacaari naacua quiquiaari saniniuujia nojoririatej. Pueyasojunaacuajaari naa sequequiaari Moiseestej, cuno taucucua paraa miaquejosaaria na jiyajiniji

puetunujuanaa. Na nuhuaji, Josueeri puetunu cuno jiyaca camaruutiquiaari puetunu Israelcuajinio caneno pueya maapuejanaa, cuno jiya camaruhua nojori quiniuria. Naa Josuee miiniu nuhuajitij, miaquetojonuyri rupaquijia turetaquiaari.

Levita pueyari
cuhuariquiaajunucua quijia saaja
Pueyasora poonijionaa nojori
quiniuucua

13 ¹Tojetaarucujanaa saaquiano Josuee quishacari tari, Pueya-soori na sequequiaari:

—Taucuaca jiyacaari queraatia quiyajaa. ¿Canteeri tiji miaquejonutaniya na camaruhua socuanitioj? Quiaari tariucua puera saaquiano.

³³Saniniuujia, Josueeri maja na camaruutiniu quiquiaari jiya nee quenaaja Leviicujinio caneno pueya, nojori jiitianura nojori cuhuarajojuarajuhua. Shaaqui. Naa nojori sequequiaariiri:

—Cuno pa Camarnujuanaanij, puetunu pa Israelcuajinio caneno pueya Pueyasoniqui, nojuacuajaari pueyara-caanu nia timitiasano quiriquiano socua nia tapueyocuaca cua camaruutishano jiyacajiniji cutara.

Saaquiano Josuee nacasusacari
narta Israel pueya na nuhuajiria

24 ¹Na shaajeyaquishacarijia, Josueeri puetunu Israelcuajinio caneno pueya rerejotequiaari Siquem jiyanishano tiacajinia. Jiyacari puetunu nojori jiyaniijianucujanaa piiquiaari Pueyaso niquiaraari. ²Jiyacari naa sequeree puetunu tii quiniaa narta Israel pueyajanaari:

—Camarnujuanaa Pueyasoori pa supuetana Israel Pueyasocuja. Nojuajaari naa sequeyaquij pueyanaa:

“Tariucuacaanu, Taree jiyanishano pueyanoori Eufrate moo casaqueyaji quijia necohuata. Cuno pojoricuaja nia supuetanaa Abraham, tarajanu Nacornio. Tii quijiaa nojori quishacari, nojoriiri tama nojori pueyasohuarajaaja nojori jiyatesano shuquiritiajaca quijia. Cuno casaari pueyano jeecojosano casaa quijia. ³Jiyacaritij, janiyajanaari na quijia Eufrate moo casaqueyaji jiyatequiaari Abrahamni. Na nuhuaji janiyari na niyacutequiaari puetunu Canaan jiyacumajanaani. Janiyari na canijiaquiaarini, naacua neyanu Isaac mueratequiaariiri. ⁴Isacri naa cua miishanojuhuaj, naacua querajaa canuu mueratejonoori. Nojoriiri nio, Jacob, tarajanu Esauunio. Naacuatej, janiyari Esauu niqutioquiaari na quijiarano tuhuananuhuaraca Seir jiyanishano jiyani. Jacob saniniuujia, nojuajaari necohuata pacuquiaari Egipto jiyajinia. ⁵Na nuhuaji, janiyari niaacua jiyaroquiaari Moisesni, tarajanu Aaronnio. Janiyari jiyacari puecoo-quiaari tojetaarucujanaa Egipcio taucuaca jiyapueranuhua. Janiyari naa cua miijionuta nojori jiyajiniji nia jaatiaquiaariuhua. ⁶Nia supuetanaa jaara quiaquiaari Egipto jiyajiniji, cuno taucuacaari nia supuetanaa nuhuajiquiaari rucuanetotajaruhua caballohua jayotasanoinia. Saa caballohuaraca pueyajaari nojori nuhuajiquiaarijuhuaj. Nia supuetanaari na miaquejosaanura naa neteyotasaquiaaritij. Naatunacu jiyanishano caminia casaqueyaji coquesaasequiaariiri. ⁷Nojori niqishacari nojori paraa, na puerenuta cua masetuquiaariiri nojori cua naacunura. Janiyari ninishiquiria jiyatequiaari nia paraa nacaacumani maja nojori coquenura nia supuetanaa. Caminiaari juhua nojori miaquiaari. Puetunu nojorijianaari shushiniuquiaari. Egipto

jiyajiniaja nia quishacari, puetunu niajanijajanaari naa cua miiijosano niquiniocuaja.

“Na nuhuaji, niaari jiyanhua tarishinio cariiquia jiyajinia nia camarucuneetanuucua. ⁸Janiyajanaari naa jacariaja nia tiuqunitiaquiaari cuno Amorreo jiyanishano taucuaca jiyajinia-ni. Cunoori pananu muetasamaji Jordaán moocuaraja. Cuno jiya camaruhuari juucua nia nujuatanu paniquiaari miaquejonu. Janiyari saaja nia shocotanijioquiaarinioj. Quiarijianij, niaari naacua nojori jiya camaruhua. ⁹Jiyacarijuhuaj, Moab jiyajinijinio camarnuuri nia miaquejonuucua sanequiaari juucujahuaj. Nojuajaari Balac jiyanishano quijia, Zipor niyanu. Balac puerenuucua niajaniya, nojuajaari na pueya jiyaramiquiaaari Balaam numootenuucua. Nio Balaamri Beor jiyanishano niyanu quijia. Balacri nocua jiyaroquiaari na rupaa nocua na niniuria ritia na shimiojotenura niajaninya. ¹⁰Janiyajanaacujajaari maja cua shanacunu quiquiaari Balaam shimiojotenura, na sesacanura niajaniya. Balacri juucua na shiniujuquiaari na sesacanu-ra niajaniya. Janiyari saaja nia maniniuhuaqueetequiaari niaacuani. Janiyari naa tacuquiaari niaacuajitij, cocuaatia nia miishacari. ¹¹Niaari naacua Jordaán moo niuuniotej, Jericoo tiacajinia tiuquishiiri. Jiyacaritij, nio tiacacajinijinio taucuacaari juucua nia miaquejonuucua sanetaquiaari: Jericoo, Amorreo, Ferezeo, Cananeo, Hitita, Gergeseo, Heveo, Jebuseocucanio. Janiyari saaja nia shocojotaniquiaari nojori miaquejonuni. ¹²Saniniuujia, maja cutaraari na tiacajiniji nia puecoo-nu quiquiaari nia mueruuta, nia cashanata noo querajaa Amorreo camarucua. Janiyari niaacuaji nojori tojetequiaarini. Jiyanhua puerenuuri

nojori mashiquiaaari, nocua nia tiuquiaquishacarijia. ¹³Janiyari naa nia niquitiono nia paraa jiyatej. Niaari naacua cuhuariquiaca jiitiaaquij, juhua quenaaja na pooniniojua. Niaari tiacaca jiitiaajuhuaj, juhua quenaaja na pooniniojua. Quiarijianij, niaari cuno tiacajinia quijia. Niaari uva, aceituna miaajuhuaj. Puetunu cuno nataacuacajanaari maja quenaaja nia natoojosano.” Pueyasoori naa quiarijia nia sequeyaquij.

Josueeri socua naa sequeree puetunu Israel pueyajanaatej:

¹⁴—Naa Pueyaso miiniuucua maninia niajanijatej, na tojitiajaca nia quiriquia. Nioojiajinia nia paniniutia nojuaja, na panishano miiijaca nia quiriquia. Nia supuetanaa quishacarijia Eufrate moo casaqueyaji, Egipto jiyajiniajuhuaj, nojoriiri na pueyasohuara na jiyatetusanoocuara jacamatujuaca quijia. Quiarijianij, niaari naa miiijojuacajuhuaj, juhua nojorijia. Quiarijia saniniuujia, puetunu cuno sacuaraatia nia miiijosanajanana nia tarinitiare saaja Pueyaso panishano miiijaca nia quiniuria. ¹⁵Saniniuujia, niaa jaara Pueyaso panishano miiniu paniaquiri, nia miiriqui tama nia panishanojaaja. Socua nia jeecaneyarequi noo pueyasohuacua teyanooacara jacamatujuacatucuaja nia supuetanaani nojori quishacari Eufrate moo casaqueyaji. Niaa jaara cuno pueyasohua jiyanishano paniaquiri, Amorreo taucuaca pueyasohua jiyanishano tojitiajaca nia quiriqui, niaa quiarijia na jiyajinia quiyani. Saniniuujia, janiya, cua niquiocua, puetunu cuata quiniaajanaanio, canaa cutaraari Camarnujanaa Pueyaso tojitiajaca quiriquianoni.

¹⁶Jiyacaritij, puetunu pueyajanaari saaja naa riucuree Josueetej:

—Pueyaso cuaara canaa shanacuyaquiiria nocuaji canaa rupatenura, tamasaca pueyasohuacuara canaa jacamatunura. ¹⁷Canaa Pueyaso-juanaacuajaari nooj, cantucuja canaa, canaa supuetanaa jaatiaquiaari Egipto jiyajiniini, teyano jiyajinia pueyaracaa-nu canaa quiquiaari seyacuajani. Pueyasojuanaacuajaari canaa niqiuara mijiono queraatia nocuaji jiuujiatesano casaa. Canaajanaari canaa namijiata na niquinioni. Canaa camarucuneetasacari cariquia jiyajinia, nojuacuajaari canaa cojuaquiaari. Canaa shocojosacari queraatia canaa paraa tiacaca nio jiyajiniara canaa nishacari nucuamaji, nojuajaari jiyacari canaa cojuano canaa paraacuajijuhuj. ¹⁸Naajuhuj, nojuajaari canaa paraa taanuuno canaacuaji canaa tajijiara panaatia nojori jiyacuma. Naa taanuucanu nio jiyajiniji Amorreoacuaca jiyanishano taucucacaariuhuj, nio jiyajiniji canaa tii quiya quiarijiani. Naa tojetaarucuajanaa maninia na miiniucua canaatej, canaari saaja na panishano miiniutiani-yani. Nojuacuajaari canaa Pueyaso.

¹⁹Josueeri jiyacari naa nojori riucuarreequij:

—Maja nia naata saa maninia miiniujia Pueyasora tojiyashijiacajuhuanaja nia quiniucua. Nojuajaari Pueyasojuanaa cutara, sesa miyaquijia tojetaarucuajanaa, naseecajuhuj. Nojuajaari maja na rejeretanu quiniutianiya nia tojiyaquishacari naarano na sequesano, sesa nia mijijosacarijuhuaj. ²⁰Tama niajanijajaa-ja jaara Pueyaso shocotere jeecojosano pueyasohua jiyanishanoocuara, Pueyasojuanaari naacua nia saniriquiano quenaaja. Majaari tari niaacua na taraajenu quiniutianiya. Nojuajaari coteenu maninia mijiojua niajaninya niaacua na taraajesacari.

Saniniuujia, niaa jaara tacaterohua taucuaca jeecojosano pueyasohuacuara nia jacamatunura, nojuajaari nia puecooriquiano.

²¹Jiyacaritij, puetunu pueyajanaari naa Josuee riucuarreequij:

—iMaja! Canaacuja maninia miiriquianoni. Puetunu canaajanaacuajaari Pueyaso tojiriquianoni.

²²Josueeri jiyacari naacua nojori sequereequij:

—Quiarijiani pueyanaa, puetunu niajanijajanaa cuaara niyajetaaquiiria quiarijia nia sequesano. Tama niajanijacuajaari quiarijia sequeree niaari Pueyaso tojijiaca quiniutianiyacuaja. Majaari naa nia sequesano niyajetatunu.

Jiyacaritij, puetunu pueyajanaari Josuee riucuatree:

—Taaquiriirinij, canaacuaaquiniateja canaa Pueyaso tojitiajacanijiaj.

²³Josueeri nojori sequeere:

—Nia sequesano jaara seetanujanaa quiri, tojetaarucuajanaa nia carterecuaraja jeecojosano casaa Pueyaso niti nia jiyatesanoniqui. Camarnu Pueyasooqua nia riujjiuurihua, seetanujanaa nioojiajinia nia paniniutia nojuaja. Nojuacuajaari tariucacaanu pa supuetana Israel Pueyaso.

²⁴Puetunu pueyajanaari naa Josuee riucuarohuacuhuj:

—Canaacuaja canaa Pueyaso panishano miiriquianoni. Nojuaja jaara canaa sequere canaa miiniuria na panishano, canaari na sequesano miiriquiano nerani.

²⁵Cuno juucaja Siquem tiacajiniani tee Josuee rerejotequiaari puetunu pueyajanaacuajani, Josueeri tii puetunu pueyatajanaa rojotooquiaari seetanujanaa na miitiushocoriquiano.

Naacuatej Josueeri pueya niishitiquiaari Pueyaso rootasano nojori niishiniuria.

²⁶Josueeri puetunu cuno rootasanojanaa

naajiotaquiaari nojoririano Pueyaso sequesano naajioneejiniajuhuaj. Naa na naajiotanu nuhuajitij, Josueeri puereetuuca saajia paree, Encina jiyaniashano naana pajama na niareeri. Pueyaso secojojua suhuortuuri cuno naana cari nujuaratasano quiriquiase. ²⁷Josueeri naa seequeree puetunu tii quiniaa pueyajanaatej:

—Pueyanaa, naana pajama cua niasano saajiani, cunoori pocuara saquiriojotariquiano quiarijia nio juuca seetanujuaana Pueyaso nia sequesanojiniji. Tama niajanியacuajaari sequereecujaja niaari Pueyaso panishano miiniutianiya. Saniniuuja, niaa jaara quiarijia nia sequesano tohuateyaquiri taa nia sequereecujaja nio saajia nniquiaranij, nio saajiaari niya pojiya nia niishiniuria Pueyasoori maja nia miyanu naa nia sapojonura nojuajatej.

²⁸Naa nojoritia na pocoojonu nuhuajitij, Josueeri puetunu nojorijianaa jiyaramiquiriohua na jiyacajinihua.

**Saaquiano Josueeri tama na
jiyajiniajaaja jamosaaquiaari na
shaajesacari**

²⁹Pasanaataja cuno nuhuaji, Pueyaso jiyaraajia Josueeri shaajequiaari. Josueeri Nun jiyaniashano niyanu

quijiacujaja. Tariucua ciento diez marijia shocotejonoori shaajequiaari. ³⁰Jamosaaquiaariirio tama na quijia Timnat-sera jiyaniashano jiyajiniajaarijia. Cunoori Efraincuajinio caneno pueya jiyajinia, na tuhuananuhuacua. Cuno na jiyari Gaas jiyaniashano tuhuananuhuajiniji pananu muetasamaji miaquetajaacuara. ³¹Josuee quishacarijia, puetunu Israelcuajinio caneno pueyajanaari Pueyaso tojijiaca quituijiajaara. Pueyaso tojitiujiaa quituijiajaaraari cuaara puequequiaarijaatijia noo saaquiapue teyonu pojoritiucujaja maninia Pueyaso miiijosano niishijiacacuajani.

**Supuetana Josee nucuhua
jamosacari Siquem tiacajinia**

³²Egipto jiyajiniji Israelcuajinio caneno pueya quiasacari Josee nucuhua nojori patusanotej, nojoriirio cuno nucuhua jamoquiaari Siquem tiacajinia. Cuno jiya nee, Josee nucuhua tii jamosaaquiaarini, cien cumaneecaari na sami quiquiaari. Cuno jiyari supuetana Jacob masano quiriquiase Hamor jiyaniashano tahuejiniji. Nio Hamor jiyaniashano tahueni, nojuajaari Siquem que quijia. Naacuatej, cuno jiya neeri Joseecuajinio caneno pueya jiya quiriqiaaquij.